

四庫全書

集部

欽定四庫全書

集部

丹淵集

目錄
卷一至四

詳校官庶吉士臣馬履泰

檢討臣何思鈞覆勘

總校官庶吉士臣倉聖脈

校對官中書臣范鑒

謄錄監生臣張若湘

欽定四庫全書

集部三

丹淵集目錄

別集類二宋

卷一

詞賦

卷二

樂府雜詠

卷三

詩

卷四

詩

卷五

詩

卷六

詩

卷七

詩

卷八

詩

卷九

詩

卷十

詩

卷十一

詩

卷十二

詩

卷十三

詩

卷十四

詩

卷十五

詩

卷十六

詩

卷十七

詩

卷十八

詩

卷十九

詩

卷二十

詩

卷二十一

雜著

卷二十二

記

卷二十三

記

卷二十四

記

卷二十五

序

卷二十六

序

卷二十七

表

卷二十八

表

卷二十九

啓狀

卷三十

啓狀

卷三十一

啓狀

卷三十二

啓狀

卷三十三

先狀

卷三十四

奏狀

卷三十五

文

卷三十六

墓誌

卷三十七

墓誌

卷三十八

墓誌

卷三十九

墓誌

卷四十

墓誌

拾遺上

詩

拾遺下

雜著

臣等謹案丹淵集四十卷宋文同撰同字與可梓潼人漢文翁之後故人以石室先生稱

之皇祐元年進士解褐為邛州軍事判官後
歷知陵州洋州改湖州未至而卒至今畫家
稱文湖州從其終而言之也遺文五十卷其
曾孫鷺編為四十卷慶元中曲沃家誠之守
邛州以同嘗三仕於邛多遺跡因取其集重
加釐正而卷帙則仍其舊所增拾遺二卷為
集外詩十六首文五首皆誠之所蒐輯而在
湖州所作黃樓賦則已佚之矣同早以文章

受知文彥博其詩如美人却扇坐羞落庭下
花諸篇亦盛為蘇軾所推特以墨竹流傳遂
為畫掩故世人不甚稱之然馳驟於黃陳晁
張之間未嘗不足頡頏上下也集中稱蘇軾
為胡侯或曰蘇子平見誠之跋中蓋其家避
忌蜀黨而改之今亦姑仍其舊云乾隆四十
三年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

丹淵集卷一

宋 文同 撰

詞賦

超然臺賦

方仲春之盎盎兮覽草木之菲菲胡怫鬱於余懷兮悵
獨處而無依陟危巖以騁望兮丘阜崔嵬而參差窮莽
蒼以極視兮但浮陽之輝輝忽揚颺以晦昧兮灑氛霾
於四垂躋余心之所行兮欲溷溷其安之蛻余神以遐

驚兮控沈寥而上馳闢曉暝以涉鴻洞兮揮霓旌而掉
雲旗導長葦以天矯兮從宛虹之委蛇曳采旒以役朱
鳳兮駕瓊輶而驅翠螭涉橫潢以出沒兮歷大曜而蔽
虧壯萬里以一息兮俯九州而下窺有美一人兮在東
方去日夕兮不能忘凜而潔兮度而長服忠信兮被文
章中激激兮外琅琅蘭為襟兮桂為裳儼若植兮奉珪
璋戢光耀兮秘芬芳賈世用兮斯卷藏遊物外兮肆猖
狂余將從之兮遙相望回羊角兮指龍肱轉嵎夷兮蹴

扶桑倚泰山兮聊徜徉下超然兮拜其旁願有問兮遇
非常勿掉頭兮告以詳使余脫亂天之罔兮解逆物之
羈已而釋然兮出有累之場余復僊僊兮來歸故鄉

石姥賦

上蒼崙之飛泉兮披蒼鬱之榛莽
骨倦虺而膺喘兮窮其巔於絕岵
爰有石而跂跂兮旁無他而相伍
色黝黝而骨勁省兮具支節而帶
文纓其遠睨之若人兮迫猶疑其
蹲虎里俗神而甚恭兮號相尊其
曰姥謂遽亟而

丐況兮緣其求而下予忽旱陽赫而上藝兮飛光流而
燎土燁多稼以巨甌兮烹羣命于碩觚走羣靈而莫答
兮後率歸而此愬役稚耄而竭蹶兮來號呶而跽請會
諸力以掀揭兮使轉移其常處靈歟然而見景怪兮衆
外愕而中怖慙堀堞而下發兮鬱黯黶而上布檐硿磕
而中作兮潏滂沱而四注回極熾而施大潤兮曾不暇
乎旋步已復還其故立兮各再拜而引去問其端而何
從兮年皆失其幾許吾聞懷澤之與符陽兮亦有石為

牛鼓彼民豐而擊之兮常以旱而取雨宛其於爾為類
兮彼又載于國譜噫惟皇之大職兮繫陰陽之煦嫗奚
磊砢之頑質兮輒矯權而自主事豈無於適然兮而惑
者槩從而為語皇忽寤而震恚兮列罪目而爾數訶星
士以施梃兮勅雷將而揮斧赫電火而灰爾兮鼓箕風
而蕩汝聞大空而泮散兮一摩抗其處所伴愚黎之偏
正兮識惟皇之覆露皇未寤而民尚惑兮徒吾髀之長
拊

蓮賦

彼芳蓮之紛敷兮，乃橫湖之繡繪。挺濁淤以自潔兮，澡清漪而逾麗。纖空其上下兮，細理周其向背。甘液凝而露浥兮，清香馥而風遞。向冰筋與玉骨兮，外吐心而露肺。承寶座之千趺兮，蔭瑤輿之萬蓋。張翠帷於月下兮，列綵仗於煙際。容鷗鷺之徙倚兮，取龜魚之茫賴。既帖水以不競兮，復汭涯而自退。實華蔕之上品兮，豈草木之一槩。

松賦

度衆木而特起兮有高松之可覲擢雙幹以旁達兮聳
千尋而上擊怪難入於圖畫兮老莫知其歲厯含古意
以茫昧兮負天材而岑寂柯磅礴而如枹兮葉黦猗而
若霧停餘雪而暖溜兮棲宿雨而晴滴險穴聚乎魑魅
兮陰枿藏乎霹靂蒙煙霧之灑潤兮傲冰霜之慘戚榮
枯繫乎所托兮用舍由乎見覓敢並名於杞梓兮甘取
謂於樗櫟

問神詞

并序

丙申歲夏五月南豳大旱土人走寧之要冊池取
神水者如市旣得各就其社祀以禱雨然踰旬不
應民甚恐懼禾稼焦枯不得食以死且疑神何不
若嚮時之速驗也羣口咨嗟余聞之為作問神辭
使歌之凡三篇如左

一

惟歲之旱兮叩羣靈而寂然
壘踵汗額以歷他疆兮俾

趨神之所淵飾盛主以借餘潤兮輦護以歸期監乃衷
之虔兮少悼民之凶飢巫歌覲舞兮舌撝而腕垂原呼
野召兮翁走而嫗馳奉新絜以羅庭戶兮日屢薦而益
祇吾將問神兮不閔此而曷為

二

寧山之環兮寧水之灣吾神宅茲兮幾千百年土民所
仰兮重如一天凡旱取雨兮易若手然潤遂灌洒兮陰
隨炳煙盡秦之境兮歲無赭田茲夏隴之槁渴兮風燥

而日前五將問神兮豈或不職而累前

三

神嘗以功兮荷天之福袞畫藻火兮冕垂纓玉樓殿轆
轤兮楹廡聯屬炫煒煜兮盤山結谷幄帝之下兮雲蔽
雨蓄宜以其潤兮惠吾百穀胡為自嗇兮肆魃之酷吾
將問神兮寵其為辱

去陵

度龍從兮外岑崒究詰竭兮辭高而謁深望巉巖之危

堦兮隱重闥于幽林石塗齟齬而直注兮盤苔磴乎千
尋問守居之何所兮凌絕壑而繚層巒欄廡鬱其紆紉
兮觀閣緣乎孱顏嗟余胡為棲此兮日儔伍乎羣山歲
月淹其兩周兮悵何時而當還煇兮懔懔若寐之
覺兮疾而復承詔易守漢上兮幸旋轅于夷陸側身東
望兮掣余思而太息山中不可以久留兮無四時而蕭
瑟

秋望

愴疑立兮臨層顛極延迤兮睇遙川杳營營兮其何之
馳澠漭兮浮寥然彼美人兮在一方望泊鬱兮蔽雲煙
期將邁兮殫所思念莫致兮勞且惓零露濛濛兮促其
歸灑涕淚兮紛如泉

送李道士

雲離離兮風淒淒羣山空兮萬木凋水澠漭兮大野平
天沈寥兮新霜晴送先生兮歸鵝池晨霞鮮兮明羽衣
乘青驪兮度南岡荷瓊笈兮秘雲章先生去兮來何時

上三嵎兮余之思間居靈崑兮摘錦詞有鶴可使兮其致之

哭仲蒙二章

惜憐栗兮臨清秋懷坐憤兮紛予憂拂其弭兮久復留
念將焉適兮升高丘問胡然兮予之思縈予心兮不解
以繆謂遐闊兮願如其宮悵西南兮川塗緬脩已忽寤
兮往嘗此以訃蓋子之生于世兮期為已休萬感芸然
兮盡予之中魄幹漂潰兮索其若抽念子一去兮不可

以復見顧予之於道兮尚胡為而此謀欲子似兮取友
但寥寥兮安求孰識子兮予深當何人兮與侔彼徒以
文行兮為子之高其不為賤正體而貴余肱如刻畫兮
妄以累子類神珠兮釁天球知子之末兮尚可以表世
其不能究者兮彼又何尤已矣乎子之存兮在予憶子
之疾兮將何時而可瘳歟予恨兮暮來歸煙雲飄蕭兮
奉予以愁

右臨高

念子將歸兮于蒿之陽彼山之中宅羣僊兮欣得子而
翱翔冠芝英兮佩蘭芳躡暉晷兮服熒煌執瓊笈兮披
錦囊遡天風兮誦霞章神君揖兮登寶牀玉女進兮奉
瑜觴予浩歌兮頌靈休瑤瑟差薦兮相與子之獻酬客
下緱嶺兮飄霞旒人來潁陽兮駕琳輶蟠桃春兮白榆
秋雲開月皎兮桂宮之幽子之樂兮千萬億年下視此
世兮不肯還猿呌鶴哀兮恍惘乎空山相望何所兮杳
莫可攀

右懷嵩

仲蒙為人無所不備采摛一二以為其美行
累之多矣劉元平常論人之賢者曰無長仲
蒙似之故同之二章如此熙寧辛亥仲秋癸
酉仁壽郡東齋題

哭任遵聖

覽穎字之渺漭兮悲萬彙之漂搖林薄颺以殞瘁兮帶
原隰之蕭條憺離魂之怫鬱兮紛渙散而孰招悵節物

之變易兮付餘懷以無聊念先生之生此兮皇局為而
有之既誕昇以才德兮又復艱其所施使輾轉於偪側
兮躓其行而莫馳哀抱憤以遽去兮問誰賢而爾師飽
道義兮富文章轟大聲兮發洪光潔如玉兮凝如霜堅
不可撓兮凜不可當嗟爾世俗兮曾莫測其所高但輒
詆以絕衆兮實自疵于爾曹且勿辨其蕪臭兮混蘭茝
於蓬蒿不善擇其至行兮務族譟而叢嗥今已矣兮想
孑立而孤居游鴻洞而入齋淪兮乘威鳳而跨鯨魚出

入乎無極兮旁羊乎太虛下視夫塵寰兮諒將厭其如
智惟不肖兮有性自天蹈大道以直騫兮繇中軌而掉
長鞭寧剛折而方毀兮恥從柔而逐圓獲稠人之笑詈
兮獨先生之見憐負先生之所與兮羌莫恤乎其他今
既失先生之為徒兮顧泯泯而奈何茲忽計以大事兮
還英氣于岷峨恨不能撫柩以一訣兮橫涕淚而滂沱
亂曰先生之美兮豈衆人之足云兮先生之慶兮有弟
賢而子文兮先生之安兮地既吉而可墳兮先生之壽

兮期萬祀而有聞兮夫何憾耶

哭許駕部

鄉余登大嶠以回軫兮過君公之故里涉郊垌而歷閭閻兮
聞兮聆弦歌之盈耳稔德義於洋洋兮時屬君之令此
因執名以願見兮遂日親於燕几挹佳論之端潔兮識
所存之可喜議為邑之良術兮欲儷君而無幾復余出
守於陵陽兮君亦擁麾于通義封壤相切行不越宿兮
朝暮之聞愈美彼邦之政素艱其施兮前罕稱乎善治

惟君之才力强敏兮條若紛絲之就理余改符於漢中
兮君復駕題輿於錦水閱月未久而君以疾聞兮忽遽
傳乎君之不起哀哉淑人之云亡兮無由撫棺而問天
以死徒臨風以永歎兮何壽夭禍福之反是獲河內之
來計兮蒙不鄙於君之子云將歸君于幽宮兮撰吉日
而且邇湯湯乎大河之湄兮我我乎太行之趾岸磅礴
而岡隱嶺兮茲有利乎君之所止限川塗之脩緬兮阻
陪葬乘之末軌悼余懷以遐薦兮曾莫殫於累紙酌芳

椒以盈樽兮寘生芻而在篚遠不能脩此以奠君兮悵
音容之已矣

送人

風寥寥兮黃葉飛黯栗冽兮寒滿衣歷崎嶇兮山逕微
背晨霞兮送子歸子之居兮錦水湄樂莫樂兮奉庭闈
凝流塵兮掩瑤徽知此音兮天下希

玉女

艷明霞兮體霏煙秀婉孌兮靜嬋娟如龍之矯兮鳳之

翩倏見光景兮忽自還乎杳然宅幽宮兮閼靈囿領羣
娣兮司寶泉福斯民兮千萬億年享豐祀兮期終山

登山

余將往兮南山路骯髒兮何高昧其適兮茫茫厯崎嶇
兮嵯峨積棘紛兮鈎衣解難進兮前阿指屢血兮險艱
翳胃拂兮叢蘿地虺結兮伺人復虎兕兮羣嗥念失足
兮安逝其悵悵兮奈何

丹淵集卷一

欽定四庫全書卷

丹淵集卷二

宋 文同 撰

樂府雜詠

秦王卷衣

咸陽秦王家宮闕明曉霞
丹文映碧鏤光采相鈎加
銅螭逐銀猊壓屋脊蟠拏
洞戶鎖日月其中光景賒
春風動珠箔鸞額金窠斜
美人却扇坐羞落庭下花
間弄玉指環輕冰扼紅牙
君王顧之笑為駐七寶車
自卷金縷

衣龍鸞蔚紛葩持以贈所愛結歡期無涯

殿前生桂樹

童童彼芳桂藹藹生廣內靈根浹和液柯葉冬不改日
月最臨照雨露偏汪濊願保剛勁質與君同萬歲

臨高臺

臨高臺望故鄉地千里天一方極目外空茫茫孤雲飛
不我將安得羽翼西南翔

自君之出矣

自君之出矣，弔影度晨夕。中門一步地，未省有行迹。閨闈足儀檢，常恐犯繩尺。欲寄錦字書，知誰者云的。

東門行

士有失所偶，難甘蓬華微。拔劍出東門，感憤不願歸。賢哉彼嘉匹，逐逐牽其衣。願同此饘粥，節義安得違。況今謂清世，不可復為非。

西門行

盛年可愛重，芳辰宜嬉遊。金甕釀醇酒，玉盤炙肥牛。青

春九十日不可一日休勿自汨浩氣滿胃藏百憂君莫
惜黃金黃金身後讎自古貪與吝常為賢者羞

塘上行

寒塘漲新雨灩灩翠波滿沙晴步聲澁風引羅帶緩蒲
牙妬舌利荷葉歡心卷生平玉衣夢至此神亦誕徒誦
小星篇無人覺腸斷

釣竿

霜刀裁綠筠桂餌掛輕緝歛迹天地間側身江海濱悠

悠寶帳夜寂寂烟波春何時投竿歸再與君子親

烏生八九子

南山有烏烏生子層崖巔戢戢新羽成相將弄晴烟朝
饑集隴上暮渴來溪前託居深林中自足終爾年胡為
去所依無乃甘棄捐却愛庭樹好羣飛投碧圓高枝踏
未穩身已隨潛弦因知萬物理主者默持權凡云愛此
命生死期已然出入既有定何歎於後先

野田黃雀行

搥鼉鏗鯨宴瑤臺紅鴉弄翼春徘徊和風入坐賓主樂
金觥玉豆天中來勸君劇飲莫自訴暗中光景能相催
試看庭前好花謝枝下落多枝上開人生不厭苦行樂
勿用感促相驚猜賢愚貴賤各有命此理悟者真賢哉

苦寒行

上太行兮高盤盤日將暮兮歲已闌入谷口兮出林端
風慘慘兮吹骨寒冰霜結兮玉嶺光上照兮天色乾
紛橫委兮草樹殘黯慄烈兮烟雲覆僕足蹶兮馬蹄抗

望所舍兮推心肝囊立空兮衣且單嗟道途兮胡艱難

苦熱行

黃人頓駕留天中金鷄吐火燒碧空炎光染雲聳岌岌
旱氣爍土飛蓬蓬龍搖乾胡不作雨虎裂渴吻無生風
安得有術辟海水入底一扣蛟人宮

俠客行

紫髯圍碧瞳勇氣炙坐熱生平脫羈勒少小服義烈堂
堂吐高論牙齒若嚼鐵寶劍壓脰橫誰恥我可雪酣歌

入都市當面洗人血常言荆軻愚毋笑豫讓拙事已不
受謝門前車馬絕自謂取功名焉能由筆舌

巫山高

巫山高高疑烟十二碧簪寒挿天危崑絕壁已飛動況
復下壓萬丈之蒼淵波衝浪激作深井虎眼徹底時一
漩長風頡湧發灑灑惡色怒勢因誰然我欲截中流虹
梁莫得施螭蜃東西相遠望不到兩目欲斷心將穿回
看高唐廟下灑靈雨遣我歸意常翩翩

水仙操

嗟哉先生去何所兮杳不可尋捨我於此使形影之外
兮唯莽蒼之山林仰圓嶠之峩峩兮俯大壑之沉沉長
波瀕涌以蕩滴兮羣鳥翻翻而悲吟寂擾擾之煩慮兮
納冥冥之至音先生將一我之正性兮何設意之此深
我已窮神而造妙兮達真指於素琴先生盍還此兮度
明明乎我心

大垂手

華堂合樂轟春晝鳳叫龍嘶畫鼉吼瓊猊壓地開組繡
美人舞兮獻君壽紅婆娑兮翠蚺蟠雪翻花兮風入柳
曳輕裾兮揚綵綬金鸞飛兮玉麟走入急破大垂手香
檀扎扎江雨驟情凝力定方舉袖烟收霧歛曲徹後錦
盈車兮珠滿斗

採蓮曲

綠纈襠紅繡裳衫盤蜂蝶裙鴛鴦雕瑰錯寶垂鬢長紫
冒翠蓋行新粧踟躕曲堤下回塘畫橈送入波中央羅

袖卷起金釧光搖輕撼脆敲短芒丹瓊紺玉低復昂霑
裏薄粉撲嫩黃蠶腰蛛腹絲懸揚列坐綠舫求北方笑
聲吃吃動明璫挨蒲拂蓼次岸旁風吹落霞供晚涼西
城鴉鴉啼女牆歸來索酒酌滿觴吳屏蜀帳圍象床困
卧不起燈燭張琉璃盞並叢生香

對酒

朝廷皦如日區宇清若水殊方文教達微品德澤被伊
人復何幸遇此栗陸氏茫然大虛內蒸鬱盡和氣真風

浹敦俗無所容一偽唯宜對樽酒酣飲樂無事人間此
昭世得偶須自貴無為名所勞區區取愚謚

白頭吟

憶昔宴華堂金徽導幽意雖知取名賤越禮奉君子相
期本同穴誰復恥犢鼻一見茂陵人烟霄與泥滓願言
保新愛妾以甘自棄恩義薄所終多生於富貴

芳樹

庭前有芳樹濃陰滿軒碧莫惜更携酒醉此青春色朝

來見鵲鳩飛鳴繞其側光景不可留徒遣君歎息

武溪深

嶠南之武溪其深不能測潭潭瀉瘴癘水色重如墨昏
然潦霧作上下毒氣塞仰視高飛鳶跼跼墮兩翼交州
惡女子制馭費銜勒伊余繆兵寄得總浪泊役常甘馬
革死持此期報國卧念少游言從之何可得

走馬引

羣蹄踏空山半夜若風雨平明即其地已復天上去惟

子迫大義盡免以名捕蝓蝸入寒殼此豈謂安處脫身
入浩渺固有神物護禮謂不戴天天知天亦許

起夜來

曉牕明綠紗蜀錦壓春卧橫腮虎魄冷驚起新夢破玲
瓏轉條脫縹緲梳矮墮高軸響銀床時誤君車過

長安道

長安道隋唐宮殿生秋草若使皆知嗣業難爭得行人
望中老

王昭君 四首

不惜將黃金爭頭買顏色
妾貌自可恃誰能苦勞力

其二

絕艷生殊域芳年入內庭
誰知金屋寵只是信丹青

其三

幾歲後宮塵今朝絕國春
君王重恩信不欲遣他人

其四

極目胡沙滿傷心漢月圓
一生埋沒恨長入四條絃

吳趨曲

三首

萬頃平湖水晴光射
早霞紅裙鬪畫楫
相結採荷花

又

岸上相將疊鼓催
青翰齊上碧波開
鷓鴣屬玉不驚起
慣見蘭橈日日来

又

蕩漾水中舟徘徊
岸邊馬相看兩不語
密意待誰寫

劉生

歷古推任俠彼劉生者何提推擊朱亥引劍刺荊軻飲
肆扶頭出歌樓掉臂過無人繼義勇關隴氣消磨

紫駟馬

翩翩紫駟馬爛爛黃金鞍流水四蹄急飛星雙目寒擁
頭青玉鉞蔽臆綠絲鞵誰取交州鼓摸將骨去看

驄馬

鬣鬣擁如雲西人號乞銀更逢桓御史特地起精神

丹淵集卷二

欽定四庫全書

丹淵集卷三

宋 文同 撰

詩五十七首

貴侯行

將軍功勲滿旂常
昨日賜對開明光
腰懸橐駝紫金鈕
爵號進拜諸侯王
戟衣翩翩弄春影
大第高門臨萬井
但願囊書絕邊警
常官中都奉朝請

朱櫻歌

金衣珍禽弄深樾禁籞朱櫻斑若纈上幸離宮促薦新
藤藍寶籠貂璫發凝霞作丸珠尚軟油露成津蜜初割
君王日午坐倚蘭翡翠一盤紅韎鞬

拾羽曲

新羅研紅裙襴齊綠縷刺衫花倒提新晴暖日麗烟草
金獸齧鎖藏春閨朱橋逼江曉沙白錦帶交風大堤窄
蘭洲遺翎得殘碧歸來驚飛上嬌額

沙堤行

金吾馳騎東復西督兵萬指平沙堤傳言築路拜新相
恐與九衢同一泥夜來上在蓬萊宿手寫姓名符夢卜
連詔黃門下北扉趣草贊辭登力牧平明劔珮羅東閣
大字滿行書德業謁者長言告紫宸感召一庭和氣合
上心喜曰予良弼未謝急宣令直筆羣吏迎歸政事堂
指顧之間歌畫一午漏初移催入馬寶帶盤腰印垂膀
歸來冠蓋爛盈門異口同音賀太平

五原行

雲蕭蕭草搖搖風吹黃沙昏沈寥胡兒滿窟臥寒日卓
旗繫馬人一足夜來烽火連籌起銀鵲呼兵捷如鬼齊
集弓刀上隴行犬譟狐嗥繞空壘羌人鈔暴為常事見
敵不爭收若雨自高聲勢叙邊功歲歲年年皆一同將
軍玩寇五原上朝廷不知但推賞

讀武紀

嗟哉武之有天下甘心神仙希羽化五十餘丈起樓觀
萬八千里走車駕安期羨門竟何在五利文成終死詐

若非留意尚文學羸政且賢非爾亞

題東崑隱者壁

青峰叢叢擁危壑綠樹團團扶曲閣幽人睡起漱寒泉
坐看一林山雨落岩前火氣雜芝朮澗下苔痕亂猿鶴
自憐塵土滿衣衫欲解從君今尚莫

東山亭

朝陽之峰乃天設曲嶺長岡地盤結下臨絕澗走縈回
上聳巍亭飛巖嶮晚雲幾處水墨畫秋樹數畚紅綠纈

安能恰會此時閒靜與詩翁吟曉雪

水邊春半

芹牙差差蘭笋短石渠冰銷水色淺倡情冶思不可奈
好鳥間關花婉婉鮮衫翠裾者誰氏行歌楊枝惜時晚
臨流有客抱危膝苦調長謠問誰遣

採藥歸晚因宿野人山舍

東岩陰深崖巘古夾澗垂泉結鵝乳我來採藥晚忘歸
試宿荆扉問鷄黍春風滿林燈火冷一夜不眠山月苦

平明携策下青蒼
松葉紛紛洒新雨

後溪晚步

陰陰芳樹暗回堤
路入蒙籠轉野溪
澤雉應媒高復下
林鷗引子歇還啼
青蒲宛宛全淹水
紫笋斑斑半出泥
倚杖風前感時節
亂烟斜日一蟬嘶

山中新晴

山中新晴曉烟暖
散帶頽冠漱岩畔
海鹽未去猿鶴喜
柴桑初歸松菊亂
林間餘雨時一滴
嶺上飛雲忽雙斷

安能舉手恣扶搖欲共高鴻拂霄漢

鹽亭縣永樂山叩雲亭

長江合高峰爽氣左右繞中流望絕巘萬丈見木杪孤
亭揭其上隱隱一拳小李君令茲邑邀我升縹緲是時
天宇淨晴色洗霜曉萬象滿四隅轉盼皆可了神清壓
塵空志適喜猿鳥人生貴軒豁世務苦紛擾茲焉獲登
覽浩思欲飛矯令謂亭我為勝絕此應少願子立佳號
光輝飾松蔦因名之叩雲大字榜霞表

杜逸人歸龍山

上亭北望二百里，顏巘墮壑圍龍山。
余嘗往來見之喜，飲食夢寐皆孱顏。
恨無羽翼一飛到，羨子長往不欲還。
安得擺手掉世故，相與傲兀於其間。

曉入東谷

振纓効王官，釋耒去鄉縣。
十年始還此，景物覺盡變。
東谷素所愛，乍到若創見。
烟雲引晨策，數里入葱蒨。
明霞照溪口，花草露初泫。
長松盤高崗，竦擢秀幹垂。
陰雜

羣木上欲接霄漢柔蘿互鈎鎖攬地走荒蔓修篁揭其
間萬个挺若箭登臨愴舊厯眺聽悅新翫讀書破茅廬
徑約已漂斷唯餘舍南水尚吐石竇濺潺潺落危壑袞
袞引飛練臨流濯塵襟照影寔覲面功名竟何所旅跡
轉孤賤引手謝猿鶴深慙爾驚怨

東谷沿小澗樹木叢蔚中有圓潭愛之久坐書
所見

野水瀉古穴石岸盤回淵飛塵不可入竹樹圍清連靜

往得勝玩深居逃俗緣寒光照煩襟景寂心自圓枯篁
蹲碧禽垂頸窺沉鮮對之不敢動相望兩俱禪

東谷茅齋

野徑轉深密靜無車馬痕松花金粉墮苔葉翠茸翻蟲
鳥春音雜烟雲晚色昏俗塵何處入長是掩谿門

夏樹

夏樹始繁密條縷方且柔左右覆吾廬合如張碧油新
蟬噪晴午餘響藏深幽軒窗轉炎日清影為我留蚊蚋

亦取庇開若春雨稠拂揮不停手咀嚼胡爾讎何當薰
風來一與掃蕩收吾將就高蔭濯足臨寒流

田舍

園林曉氣清籬巷夕陽明石竇聞寒碓烟坡見晚耕豚
蹄供禱賽龜殼問陰晴欲識豐年樂一村雞犬聲

高槐

高槐夾前除合蔭卷若洞交柯載宿雨壓地翠色重青
蟲煖自挂黃鳥晴輒哢枕簟傲炎風為君高興動

春閨

枕帶縈春思，窻紗漏曉光。
蟪蛄傷遠別，鶗鴂感流芳。
粧匣蒸殘粉，薰爐試舊香。
洞房燈燭外，只有夢悠揚。

採桑

谿橋接桑畦，鉤籠曉羣過。
今朝去何早，向晚蠶恐卧。
家五十日誰敢一日惰，未言給私用，且以應官課。

青城山丈人觀

羣峰垂碧光，下擁岷僊家。
神皇被金巾，坐領五帝衙。
威

靈攝真境俗語不敢譁精心叩殊庭俯首仰紫華願言
鳳羅盟畢世驅塵邪循奉藥珠戒期之飛太霞

上清宮

瓊臺橫紫霄上有縹緲居雲霞抱窻戶日月循庭除飛
羽下金輦隱芝吟玉書俯首視人間人間臭如帑

張少愚書院

澗水侵斷橋車馬不得通飛嵐積庭礎秋蘚垂紫茸窻
紙爛溪雨簾衣拆林風主人殊未歸使我烟景空

誓鬼碑

正一受天籙腰垂神虎章羣魔獄幽隱秘篆刻青蒼故
事駭前志餘威驚大荒誰能識奧訣禹步學魁罡

天師栗

天師携此種至自上饒遠當時十七樹高幹倚孤巖蒼
蓬蒺藜大紫殼檳榔軟蜀部名果中推之為上選

孫知微畫

太古奇偉士精思獨於畫馳心入茫昧萬物赴揮灑當

時一名重顧陸非爾亞卓哉青城筆妙絕冠天下寥寥
九天仗一一若神寫吾恐千載後是終無繼者

早晴至報恩山寺

山石巉巖磴道微拂松穿竹露沾衣烟開遠水雙鷗落
日照高林一雉飛大麥未收治圃晚小蠶猶臥斫桑稀
暮烟已合牛羊下信馬林間步月歸

楊山人歸綿竹

一別江梅十度花相逢重為講胡麻火鈴未降真君宅

金鈕曾盟太帝家
道氣滿簪凝綠髮
神光飛鼎護黃芽
青驄不肯留歸馭
又入無為喚曉霞

閒遣

庭竹擁高叢
移床就好風
掩門休務外
隱几坐忘中
世事元何物
人心了即空
客來休借問
此意浩無窮

睡起

寥寥公館靜
門掩似山家
竹簾屢移枕
石盤頻浸花
閒多新得策
事少早休衙
一覺高春睡
誰來伴試茶

梅

寒梅引舊枝映竹復臨池
朶露深開處香聞暫過時
凌兢侵臘雪散漫入春詩
贈我歲寒色憐君冰玉姿

永泰劉令清曦亭

木杪照初日捲簾知曉晴
軒窗無限思圖史有餘清
露下濛花重風來泛竹輕
何須嫌五斗持此謝淵明

貧居

繩床擁敝裯初起髮未櫛
南窗展書卷就暖讀寒日門

前絕車馬薄暮垂片席短牆挂纖蔓幽鳥啄紅實羣蝸
惡積雨繚繞篆空壁男兒處貧賤舉首宇宙窄翩翩搶
榆鳩宛轉匿絮蟲妻孥競相笑憔悴守文筆

惜花

胡蜂採花花氣薄黃鳥啄花花藥落林風吹花花片亂
池水浸花花色惡少年惜花會花意晴張青幃雨油幕
勸君直須為花飲明日春歸空晚萼

貞女吟

身外無一簪何以供鉛華飾行不飾容濁水白藕花藕
心亂如絲妾心圓如珠絲亂端緒多珠圓瑕類無焉得
偶君子奉之此高節所生雖至親此意安可說

莫折花

莫折花花好亦自喜勿謂花無言請以君心酌花意君
容待花轉豐艷花枝因君愈憔悴莫折花任花飛落地但
對春風倚芳樹長遣香英伴君醉

織婦怨

擲梭兩手倦踏籊雙足趺三日不住織一足纔可剪織
處畏風日剪時謹刀尺皆言邊幅好自愛經緯密昨朝
持入庫何事監官怒大字雕印文濃和油墨污父母抱
歸舍拋向中門下相看各無語淚迸若傾瀉質錢解衣
服買絲添上軸不敢輒下機連宵停火燭當須了租賦
豈暇恤襦袴前知寒切骨甘心肩胛露里胥踞門限叫
罵嗔納晚安得織婦心變作監官眼

野花歎

昨看百草抽新芽今看百草開新花
岩隈水側自成列紅醜紫賤何交加
東皇施恩豈不溥隨所付受無少差
爾之瑣細亦蒙被盡使奮發爭春華
纖叢密蔓不可數競起塗抹如矜誇
妖鶯冶蝶不爾顧去爾自欲尋名葩
爾知有艷貴爾否歌管匝樹侯王家
爾徒此地弄顏色只自狼藉隨泥沙
何當照水自窺覽枝赧葉懼相藏遮
晚村無限曬殘日索酒為爾成吁嗟

均逸亭

晉州三亭

亭宇跨城端新苔磴道盤風光晴水石烟景暮林巒薄
領仍多暇賓從每盡歡何由掉塵鞅聊問借闌干

東溪亭

短舸逶迤渡高欄天矯沉波光環堵淨日色綠梁深萍
荇翻金鯽蘭苕超翠禽主人公事簡時此照清襟

碧崖亭

斷巘淥溪邊危亭翠壁前軒窗誰是客詩酒自稱僊遠
壑春藏雨長波晝起烟吏人休報事高興正陶然

送郭經知縣

促促送歸客短亭垂柳風離樽掩殘日去騎若輕蓬百
里謳歌內三年畏謹中鄉人問蜀物笑指一囊空

過祿氏山齋

過水得憑檻滿川皆夕陽江山逢勝絕手筆恨荒唐城
郭蒙籠近汀洲杳靄長明朝又東去塵土入衣裳

題李處士月軒

圓蟾噴金波萬里灑清滴幽軒得虛敞皓彩溢素壁繩

床有高隱苦調起岑寂盈襟納孤光靜與爽氣敵

余過興州太守晁侯延之於東池晴碧亭且道
其所以為此池亭之意使余賦詩

鄭谷題詩處荒涼不復知使君來問日景物欲歸時崖
巘供清溜亭臺繞翠漪主人憐過客借與傲炎曦

蒲氏別墅十詠

風交蒲葦亂烟斷鳬鶩飛日暮一笛起扁舟垂釣歸

右方湖

軒窗曉吹清枕簟晴光冷亭上逍遙人滿身搔水影

右涵碧亭

逼簾呈素艷入座薦清香何以陪暑飲對之飛玉觴

右白蓮堂

曉靄滋花色晴輝發水光何人露新纈不管著秋霜

右芙蓉溪

積水自淵淵來源常汨汨岸上翠衣禽對人時一沒

右魚池

紫蓋嫩貼水玉梢長刺沙避風紅出沒驚雨綠交加

右蓮池

溪光揉玉壁雲影漏金盤誰此伴高興盡橋憑曲欄

右清蟾橋

決水轉橫渠交塍畫方罫秋風報秋熟滿頃吹擺稭

右稻畦

高臺按虛境飛駕羅太空小兆佩神虎每來清夜中

右朝真堂

深深鄭真谷小小焦先廬借問貯何物滿床皆隱書

右草庵

丹淵集卷三

欽定四庫全書

丹淵集卷四

宋 文同 撰

詩五十一首

蒼溪山寺

正午風色高遂泊蒼溪縣層崖抱林木有寺藏蔥蒨出
舡步危磴蔭密頗縈轉上到金僊家緣空列臺殿修篁
掛懸溜坐覺炎暑變老僧曉經論言語何貫穿引我上
高閣闌干俯江面寥寥百里內山水盡奇觀誰謂羈旅

中所見皆所願汀洲白鳥聚井邑青烟散樂此暮忘歸
踈鐘起岩畔徙倚下松門尚怪舟人喚

五里三灘

羣石壅水成哀湍五里之地凡三灘舡如走丸勢不住
力敵萬弩雲濤盤門窻掩塞怕飛浪已倒床座翻盃盤
長年三老色自落捩眼不敢窺波瀾捎渦撇漩出九死
衆命幸免魚鼈食須臾出纜繫高岸競以好語相慰安
是時左右有觀者應亦為我心增寒

咎公溉

晚泊咎公溉船頭餘落暉携家上岸行愛此風滿衣村
巷何蕭條四顧烟火稀問之曰去歲此地遭凶饑斯民
半逃亡在者生計微請看林木下墻屋皆空園好田無
人耕惟有荆棘肥至今深夜中鬼火流清輝衆稚聞此
語競走來相依錯莫驚且哭牽挽求速歸

王會之秀才山亭

盤盤翠城山君在城中住溪流通縈轉岡勢復回互蒼

林無春冬啼鳥常旦暮漠漠嶺頭雲霏霏岩底霧中間
列亭榭佳景實天付物象皆自然人巧誰能寓浮生欲
何事有此即樂處況君弟兄賢信道各已固詩書誨兒
姪觴豆燕逢遇敢問彼簪裾何如此巾屨

謝友人寄畫

客從長安來厚紙封小軸題云此奇畫寄贈公可蓄開
之掛高壁爛絹止一幅中有兩駱駝氣韻頗不俗大駝
載半髀正面頸愈曲小駝方就乳蹲身脚微跼一馬立

其後才露頭與足三犬乃子母共臥銜鬻肉老羗抱朱
旗狀貌何狠愎端然立高岸勢若不可觸定是羗中酋
華旃蓋鮮服不知何所來隨從無一僕初誰作此畫精
妙亦可錄應餘右方在次第不止獨更願君訪來我肯
萬錢贖

夏日閒書墨君堂壁二首

先人有敝廬涪水之東邊我罷漢中守歸此聊息焉是
時五六月赤日烘遙天山川盡燉燥草木皆焦燃塵襟

既暫解勝境乃獨專高林抱深麓清蔭密石綿層岩敞
戶外淺瀨流窻前邀客上素琴留僧酌寒泉竹簟白石
枕穩處只屢遷忽時乘高風遠望立雲烟野興極浩蕩
俗慮無一緣氣爽神自樂世故便可捐却憶為吏時荷
重常滿肩几案堆簿書區處忘食眠冠帶坐大暑額汗
常涓涓每懼落深責取適敢自便安閒獲在茲恍若夢
游僊行將佩守符復爾趨洋川山中豈不戀事有勢外
牽尚子願未畢安能賦歸田

其二

歸來山中住便作山中人冠帶亦自閒累月不着身散
髮層岩阿濯足清澗濱石蘚黏簡冊松風墮衣巾鄉里
多舊游不厭過從頻山肴與野釀待我如佳賓有召即
走赴愛其愛我真常恐禮數乖取問吾交親正此一夏
樂忽茲邁蕭辰還愧擁千騎又走西道塵

送馮允南倅梓

去年父老送督郵衣上淚痕猶未變今年吏民迎別乘

馬前懽聲挽不斷梓州城中十萬家家盡喜見君面
以君鄉里最相近物態人情素諳練況復才力強且明
中理之的無漫箭從來府政號少事今更得君愈清簡
太守李公詞掖老淘汰心源無滓澱時攜賓從訪山寺
惟以高譚侑清宴蒼崖素壁多自書是處新詩題欲遍
君今到彼亦爾為異日唱酬知幾卷

宿東山村舍

是秋粟為白蟲所食
蟲復為羣鷄所食

八十雪眉翁燈前屢獻歎問之爾何者不語惟拭淚良

久云老矣未始逢此事種粟滿川原幸已皆茂遂喜聞
欲登熟近復失所冀有蟲大如蠶日夜嚙其穗羣鷄利
蟲食剪摘俱在地驅呵力難及十止餘三四供家固未
足王稅何由備瘠土耕至骨所得幾何利又令遭此禍
不曉上天意在世幸許年必以饑饉死聞之不敢詰但
愧有祿位移燈面空壁到曉曾不寐

季夏己亥大雨

黑雲堆空天地昏風勢猛惡山岳掀怪電燒爇噴霆喧

鯨海起立星漢翻玉竿銀索傾鉗盆豪威怒力凌乾坤
川陸浩渺同一源泛濫直欲浮高原澗谷洶湧龍蛇奔
溝渠溪壑相吐吞土肉刮盡惟骨存漂蕩秋稼無一根
天生烝民主仁恩覆露養育生理蕃誰持害鑰開禍門
絕滅黍豆災元元無路能去陳九閼此事是非安可論

謝任遵聖光祿惠詩

常念文選詩最愛顏光祿君今作此官詩亦顏之躅尋
常得君詩如隼饑見肉凡當憂憤際不可不取讀我自

山南歸幽居值炎溽六月久不雨萬物蒸煮熟正在墨
君堂流體汗可掬單絺與圓素豈解療煩毒聞君有詩
至猛起捧大軸拆開得累紙半日了一幅使我困病除
如藥清頭目把詩坐前軒憤惋幾欲哭君也實高才徑
庭無骭曲六十尚為縣不自恥碌碌近聞移小麾所用
愈局促安得長康莊走此老驥驟哲士甘藜藿鄙夫厭
梁肉天理不可問長吁倚喬木

謝任瀘州師中寄荔枝

有客來山中云附瀘南信開門得君書歡喜失鄙吝筠
簌包荔子四角具封印童稚瞥聞之羣來立如陣競言
此佳果生眼不識認相前求拆觀顆顆紅且潤衆手攫
之去爭奪遞追趁貪多乃為得廉恥曾不問喧鬧俄頃
聞咀嚼一時盡空餘皮與核狼藉入煨燼

霹靂

六月四日有
父子被震者

君不見前時忽疑天地坼萬里一聲晴霹靂彼某氏者
爾何人敢自欺誣被誅磔子爛華容神火燎父碎梓潼

靈巖劈惟震與曜今曉然誰對君親肆姦逆

後溪

新晴揉藍染溪色我愛常來坐溪側一林奇石宛如畫
兩岸野花殊不識蟬鳴盡日競何事鷺下多時猶未食
細觀物理須靜中歸去無辭更昏黑

黃功垂秘書嵐城閣

羣峰繞高軒四望如城密晴嵐逼窻戶淨若新洗熨香
香其中人衣襟照寒碧臨風設橫几瀟灑坐終日門前

車馬道擾擾亂如蝨轉眼不復觀長歌傲簪紱

鳳山古祠

林木摧折堂廡傾其中壑像猶縱橫狂巫騰踏野老拜
瘦雞薄酒邀神明形容詭怪蛇虺亂聲音醜惡鴟梟鳴
災牛禍犬亦可作世有此事何由平

靜中吟

客去復掩戶高松下清陰微風動其間對語雙珍禽幽
人獨凭几聽此古意深起來南窻下被以朱弦琴彈之

代佳話俚耳誰知音

送黃庶先岷州赴舉

朝廷取士及洮西君今去就岷州薦男兒致身自有地
六月萬里君莫憚君也經術三十年此發必中后羿箭
聲名大抵重文章慎莫便從班定遠

大熱見田中病牛

壠上病牛良可悲皮毛枯槁頭角垂兩鼻銍斨只自喘
四蹄劣岌曾不疲牧童默坐罷牽挽耕叟拱立徒嗟咨

朝驅暮使氣力盡爾死主人安得知

呈里中諸友

君莫怪我不讀書君莫笑我不飲酒更精文史豈足用
漸老懽娛復何有負郭安得二百畝舉家已聚三十口
且來伴我數月間未幾區區又西走

寄彰明任光祿遵聖

軒軒任公子本是釣鼇人手把虹蜺竿一舉百萬鈞得
鼇謂無用坐卷千丈綸却自絳蚯蚓淺瀨收纖鱗悠悠

世上兒不識此有神但將俗士眼下視窮水濱

庶先北谷

路自西溪入園當北谷開月亭詩作客雨館睡為媒摘
果衣霑露尋泉屐漬苔間居正無事莫問我頻來

謝王庶軻秀才見贈諸篇

覽君山中詩多有贈我篇感此意愛厚使我將潜然世
態日衰薄交道君獨全豈若賤丈夫心醜貌甚妍我已
嬰組綬君方傲林泉出處雖有殊所樂同一天

前溪獨遊

溪水碧溶溶，紆餘短笱通。
小灘晴靄外，獨鶴夕陽中。
倚杖對清瀨，披襟當好風。
幾時歸住此，長下釣魚筒。

書綠帷亭壁

喬木繞舍如綠帷，羣山四面寒參差。
春禽入秋啼自別，早雲到暮歸常遲。
庭前好菊勸飲酒，案上佳紙邀吟詩。
閒居數月興便野，渾忘簿書相聒時。

青山道

冥冥青山道叢木含古烟遠客事行役未晚不敢前乳
虎正養子采食大路邊但顧已所急其誰辨愚賢

野老

野老扶白頭耕壟事田隴豈無兒與孫凍餒實我恐地
產止數出財用知幾種食肉與衣帛賢者何言冗

誰氏子

縹緲誰氏子學道要昇仙人世豈不樂何苦求上天反
首顧我語子豈得謂賢智如撲燈蛾甘就膏火煎

秋興二首

晨風吹茂林夕露下芳晚
秋容變憔悴復此白日短
蕭蕭歲華暮冉冉節物換
浩歎倚前楹使我心曲亂

其二

白蟲感秋陰入夜聲更切
問爾苦何事到曉啼不歇
盈庭不可止翳藏萬穴會
是天使然相將送凋節

書平泉草木記後二首

衛公當國日力與天地均
平泉植草木取盡四方春
海

嶽欲必得亦能役鬼神可笑身未冷已聞屬他人

其二

公豈不聰明嗜好乃如此若非以私餌是物安至止彼
致者何人定非端潔士草木固為塵醜名終未已

重過舊學山寺

當年讀書處古寺擁羣峰不改歲寒色可憐門外松有
僧皆老大待客轉從容又下白雲去樓頭敲暮鐘

書隱者壁

枳棘分三徑猿猴結四隣茂林修竹地枕石漱流人看
雨捲藤杖迎風卸葛巾我來懷愧甚衣上有紅塵

訪古寺老僧不過書壁

寂寂復寂寂門前苔蘚積巾鉢定何之禪房封屈膝蛛
絲網窻戶蝸涎篆牆壁欲去重遲留空中望歸錫

村居

日影滿松窻雲開雨初止晴林梨棗熟曉巷兒童喜牛
羊深澗下鳬鴈寒塘裏田父酒新成餅罌饋隣里

宿田家

日落雲四起牛羊下高原
今夜宿何處孤烟生遠村
寥寥岩狖響擾擾林鷗喧
危坐欲終夕此意將誰論

大熱

大熱早復暮幽居如火圍
更無風稍快只有汗頻揮
袒露憂生客沾濡怕熟衣
何當生兩翼直近廣寒飛

閒樂

晝睡忽過午好風吹竹林
溪雲生薄暮山雨送微涼
粉

裛衣裳潤蘭薰簟席香歸來閒且樂多謝墨君堂

寄楊歸一

出處久異矣居常勞所思烟霄惟子未鬢髮已翁為世
故豈須問人生當自知林泉聞幸好足可樂明時

行李載書成詠

於世已無用何苦愛讀書自笑身許大所處如蟬魚編
簡補斷爛卷軸收殘餘又鎖十餘篋作數隨行書

還友人詩卷

作詩所患格不高君今已得詩中格吾鄉風物最清麗
君向其間作詩客定餘絕景在幽深更欲煩君用刀尺
上亭北軒對月吹笛得才元舍人昭華引醉霜
月草堂吟皆詩譜也 三首

潏潏金波瀉碧空隔霜寒影下征鴻夜深一笛昭華引
吹滿千岩萬壑中

其二

羣山暝色烟開後遠水寒光雨過時今夜何人醉霜月

臥聽緱嶺玉參差

其三

涪江東岸有雲林巒嶺縈回澗谷深
何事遲留未歸去
強顏猶唱草堂吟

苗子居運判歸宿州同赴武康西縣道中奉寄

二首

霜風舞征袂有客去符離
斜谷雪晴後曲灘水滿時
亂山誰對酒孤驛獨吟詩
不得陪清絕悵然空所思

其二

漢中為會失兼程
雨雪曾無一日晴
拗項橋頭聊立馬
使車應已過褒城

孫懷悅紙本亂石

孫老抱奇筆
臨紙恣揮灑
從頭掃亂石
礫碕隨墨下
焦頑與圓潤
無一不精者
誰信萬鈞重
卷之不盈把

熙寧辛亥歲春
予自京師赴陵州
因過家省墳墓
是時見所居東西
長衢比戶競取榆
栽列植

於官道左右者後移興元滿替復歸待洋州闕
始四年爾而榆已高大繁茂深密可愛予正得
此過一夏旦夕與諸親友優游於其間蒙庇厚
矣間因作詩示諸君

昔我去守陵陽日門前夾道初種榆今年我自山南歸
向椽大者皆柱麓兩邊合陰若深洞滿地清影繁如鋪
是時暑氣正炎酷無處容此煩病軀晝搖清風夜篩月
日日不可離羣株間邀親友坐其下左右間設琴與壺

人生適意乃為樂此樂已恐他更無霜飈未起枝葉在
且與諸君同此娛


旱雷

夏旱亦已久衆懼非常災茫茫大田中赤風起炎埃密
雲徒滿空甘澤竟不來但聞南山下日日喧怒雷

久不雨喜見晚雲

晚雲萬丈如銀山日光返射紅孱顏莫誇突兀在天上
且放滂沱來人間雷公施力已憤怒風伯壞事休庸頑

我將待之至夜半慎勿更似前時慳



丹淵集卷四

欽定四庫全書

集部

丹淵集卷八

五至

詳校官庶吉士臣馬履泰

檢討臣何思鈞覆勘

總校官庶吉士臣倉聖脈

校對官中書臣范鏊

校對官庶吉士臣嚴福

謄錄監生臣張若湘

謄錄監生臣李維瀛

欽定四庫全書

丹淵集卷五

宋 文同 撰

詩五十一首

賈佩蘭歌

綠髮憶新梳，君前侍玉壺。
相隨五色鳳，飛止帝宮梧。
鳳時入紫烟，一舉萬羽趨。
乘風恣教盪，衆首傾雲衢。
帝既天上行，留鳳不與俱。
鍛翮下水巷，髣髴編鉗徒。
赭衣春且歌，北望鸞鷟呼。
凜凜赤喙鳩，一盃死其鵠。
鳳亦飲瘠。

藥鞠域支體殊娥姁豈不仁幸此全賤軀歸來南山下
秋風裂羅襦寒床覆龍具霜雪侵肌膚忽自感時節臨
風只長吁徒懷掖庭事飲泣對民夫

徐太元

彼徐太元者杭州之叅軍同僚曰張惠犯賊抵深文徐
哀其母老詣獄輒自陳謂惠所受賊太元本同分今儻
獨坐惠此獄無乃冤均之不滿法惠遂減死論太元亦
坐免不調十餘年西臺李侍郎典選世所賢聞徐之所

為特以不次遷擢授鄭司功太元名始傳後為申王師
德行人推先嗟哉後世人恩義日不完初既同職事言
色殊相歡諂酒與佞食旦夕同杯盤一有不得意艱險
立萬端推之入網羅又以毒箭攢昂然了自得銜露其
術全此等雖曰人犬彘曾豈然眼見與耳聞天下何可
言我今作此詩中有二義存欲使在位者此風幸相敦
勿令有識人命爾為蠅蚋又欲彼正士為國掌三銓須
察此惡子廢斥冗員自然此浮薄不長其姦根覽者

請味之勿罪其言煩

蓋寬饒

次公清而狂其本出天性惜哉公廉質不以儒術正陷
害公峭刻奸犯語堅勁在位及貴戚合然仇怨盛稀遷
愈失意躁戾因以逞王生識其趣勸以全壽命胡為不
開納封事轉凌橫五帝官天下此語豈君聽上怒以不
改章下求衆定確然金吾奏直以大逆訂雖為鄭昌頌
萬嫉掩一諍遂爾屬諸吏羞復受笞榜行當北闕下輒

引佩刀到時雖衆所憐終為端士病

諸葛豐

少年名特立初為貢公起元帝擢司隸刺舉無所避問者何久濶京師語如此馳車下許章去節自豐始上書擿章惡此舉誠可喜奈何少恩怨春夏常繫治人多訟其短遂徙城門尉復列堪猛過上為之切齒制詔白其罪不忍下豐吏豐初在朝時數道堪猛美失職乃自取不內省諸已反感怨其他轉譽以為毀不欲加以刑上

憐之老矣庶人終於家反覆豐可恥

新津退思堂

三江古劇邑入籍生齒夥詞源百端起區處不可愾子
醇為之宰幽隱照必破斷事精且密有若麥厯磨尚懼
忽一失退即此堂坐戾者思改易無使下罹禍如此凡
二載不識有纖過賢哉令之師敢以此為賀

墨君堂晚晴凭欄

墨君堂中看新霽十里平林鋪淨綠青烟一去抹遠岸

白鳥雙來立喬木戴勝入園蠶已老栗留過隴麥將熟
坐待月破東嶺雲自取簾鉤更高軸

山舍早起探晴

山鳥轉晴日獨行風滿林澗花薰野袂岩水濺幽襟側
石驚新滑垂蘿愛近深蕭然此清興不似戴華簪

東谷獨往

久不到東谷晚晴欣細履陰陰夾路木濺濺落溪水幽
涎界屏粉亂喙刻窻紙兀坐忘所歸烟雲逼人起

西崦道友

西崦入深窅幽茅藏隱仙
虛窻畫雲篆淨几校靈編
絕巘聳玉幹危岩瀉珠涎
相留飮青飣人世凡幾年

送李野夫兼簡公擇學士同年

吾友野夫官滿歸峽中風物正春時
莫因道路起長歎且對江山吟好詩
異日滑臺君若到寄言別乘我相思
聲名已重更論底但引冰堂金屈卮

任居雲棲枝閣

峩峩仙鸞山杳杳山上閣道傍問耕者居雲之所作居
雲個儻士韁鎖不可縛讀書三十年議論寫不涸縱橫
入衆藝深曉不止畧自笑與世踈回首念岩壑安排事
幽隱終老期此託結茅層巒巔退比籬下雀棲枝榜其
號意豈羨鵬鶚時茲入岑絕寄憤滿寥廓江風拂危欄
澗月滿踈箔獨橫古溜琴居雲琴名遠意追淡泊蕭蕭履霜
操隱隱天外落履霜居雲之所好彈者飄揚雜仙籟泛響度林薄
其誰共高興維此猿與鶴願言解塵纓一赴方外約

朱康叔郎中棄官求母於金州因會華清宮作
此詩送之

蟠桃實在枝蟠桃花已飛相隔五十春一旦還相依康
叔視金龜解去如糞土徒步入堯關金州取其母古人
亦有此比之康叔難幾時有古人能如公棄官玉蓮仙
宇中相會談此事使我發驚歎達曉不能寐借問侍安
輿輦下何時過我欲率諸君扶服詣門賀

蓬溪蘓令均利泉

潛流蔽荒壤嘉惠鬱所施邑人念遠汲視此無以為蘇
君作之令大利收前遺一日會衆鉤茲焉發清漪既已
就新甃瓶缶何纍纍盡言彼汙濁豈爾同甘滋比戶獲
美飲頌君皆一辭何以紀君德是泉無涸時

寃婦行

婉婉西隣女韶顏豔朝霞淑性自天與少小傳令嘉孝
愛親黨重巧慧閭里誇其母最嬌憐看若眼下花自從
掙冠笄未始離窻紗讀書佩箴戒舉止無纖瑕求媒不

自審得婿非良家。如以瓊樹枝使之並兼葭。憶初行嫁時。遺贈矜豪華。明珠蹙桂裾。雜寶裝簪珈。餘貲詎可數。但較輦以車。其姑本寒種。貪壑常蝕砒。得婦不問好。求索惟無涯。侍奉四五年。叫物愈餓鴟。百欲一不應。用毒同虺蛇。豈惟被詬辱。抑亦遭笞撻。使執賤役課。責日夜加手。指盡禿瘰。鬢髮仍髣髴。一旦不任事。病骨枯若槎。委頓臥在床。尚爾磨怒牙。既死亦不顧。但恣攫且拏。聞之道路人。涕泗而咨嗟。養女擇所適。此事寧輕耶。家

法要相委在邇不在遐
娉禮貴得中尚約不尚奢
尊璋若慈仁至死甘
苧麻請看西隣女一失千里差

林居

宿髮未暇梳林居且辰
詣鮮暉散清滴濕濕滿衣袂
仄行蓋前礙傾視因遠翳
野意浩盈懷曾忘傲公退

墨君堂

嗜竹種復盡渾如王掾
居高堂倚空岩素壁交扶踈
山影覆秋靜月色澄夜虛
蕭爽只自適誰能愛吾廬

鑑崖

山居有青崖
平滑如鑑

層崖瑩青瑤冷滑不可捫秋光發淨照林影搖晴瞰飛
瀑滌吟肺垂蘿清飲魂惟憂漬愁霖碎蘚來相痕

宿超果山寺

荒途涉沮洳危嶺升坡陀愛此清淨居不倦來往多山
僧見余喜顛倒披乾陀引我坐前軒山果丹碧羅食已
步野徑新柔踏晴莎就石枕古稜依松執長柯是夕乃
宿此東山吐圓波夜久不能寐禽蟲伴幽哦達旦鳴落

葉固非俗士歌岩猿與谿鳥應笑頻經過

富樂山海師

上人者何人富樂之禪客成都昔嘗見時已坐法席別
來二十年嗟此出處隔昨過芙蓉溪捨櫟得攜策盤盤
轉危磴上叩金仙宅林間識孤標梵眼老愈碧引我翠
壁下煮茗拂蘚石問之第二月雄辯發古譯無由從之
遊不得蒙久益翻然入塵闥俛首愧名跡

彭州南樓

百尺壓城端飛簷欲上搏湖光搖埤堦山影轉闌干秀
野含春煦喬林擁暮寒回頭大嶠雪千仞玉嶺巔

大慈交師演古軒

萬法一軒中周回百座容曲燃簷蔔久橫揭貝多重信
士供晨鉢門人集午鐘何時聽雄辨幾柄換庭松

新晴後溪樹陰灑然覽景成韻

雨後溪水急晴光鬱如浮高林放繁陰黢黢幢蓋稠麥
熟桑椹好撩亂黃粟留咿咿動新蛭局局啼乳鳩晚策

貪靜境緩帶成獨遊
照影俯回淵濯足臨漫流
願言懷世慮逐此瀟灑
休定知今夕夢不作塵土憂

黃秀才北郊書堂

吾邑固僻陋巉巉合羣山
苟無賢者居孰能營幽間
黃子治北郊勝絕收其間
長溪斷谷口囂譁隔塵闌
始至甚夷曠漸往頗險艱
洞穴烟雲昏澗壑松桂環
幽芳自芬馥野晁常綿蠻
繚磴挂絕壁孤狖飛遙灣
氣象奪天奧景物搜鬼慳
築室貯羣籍軒窗面孱顏
朱黃列几案

坐把古穴刪自取天爵高下視五兩綸處心固已定詎
恤時輩訕伊余素無似謬入文墨班前得省親歸屢此
容追攀時亦竊講議始蹈賢聖關譬之拉虎豹所得纔
一斑自愧鄙樸姿得涉道誼寰余亦有東谷對此何格
頑每來輒盡日須步明月還

讀楊山人詩

秋高羣山空衆籟吐天竅霜飈擊林野岩壑起哀詔蕭
蕭寒月下合若萬鬼嘯疑是太古魂幽幽此中弔山人

住中巘側耳得清峭譜之入文字滿卷冷雪照其聲太
淒楚勁澁皆古調俗尚正淫靡惑者自夸耀山人持之
歸無乃取衆譙會有知此音相逢當一笑

已師竹杖

已師杖奇竹坐亦不去手循摩瑩且臙瘦骨何蚴蟉叢
枝抱奇節兩兩相對走尋常出孤梢上下分左右如何
此獨異天產固非偶師初得之誰此實世未有不為師
所用亦共衆植朽願師勿棄置珍之比靈壽

晚至村家

高原礲确石徑微籬巷明滅餘殘暉舊裾飄風採桑去
白袷卷水秧稻歸深葭繞澗牛散臥積麥滿場雞亂飛
前谿後谷暝烟起稚子各出關柴扉

雨喜客過

積雨無所詣十日不出屋故人念端居牢落如槁木高
軒過窮巷下馬想慰沃載酒酡揚顏裹飯飽桑腹日暮
從者散還尋舊書讀

墅居

不復入城市亂山圍一村雲霞供几席水石佐琴樽
病久筋力緩眠多頭目昏無人來谷口苔蘚上松門

東窻

叢榆落碎鈿蔓柳撲輕綿麗晚暗紅霧曲堤橫翠烟
嘉樹正陰合好禽新語圓東窻日已滿猶記隱囊眠

大雨

驚雲駕長風大雨灑九有崩騰百川倒豪怒一雷走茫

茫草木亂隱隱岩谷吼高閣晝眠人覺來但支肘

芹歎

清霜入寒溪水迹落一尺飛沙上芹葉脆卷如燎炙孤
根抱生意春澤守遺瀝願奉野人薦充君盤中實

憂居

憂居向山林蟲鳥日為伍形骸乍摧剝骨肉慣辛苦蔬
盤羞客至病榻厭人語地僻誰往還閒門閉深雨

任氏鳴璫橋

清谿漱碧崖，袞袞寒聲落子川。
愛溪聲架橋橫絕壑，山風撼松月倚檻聽噴薄。
遂號曰鳴璫，古人無此作。

過友人谿居

籬巷接菰蒲，間扉掩自娛。
水蟲行插岸，林鳥過提壺。
白浪搖秋艇，青烟蓋晚厨。
主人誇野飯，為我煮新蘆。

江上主人

客路逢江國，人家占畫圖。
青林隨遠岸，白水滿平湖。
魚小猶論尺，鷗輕欲問銖。
何時遂休去，來此伴潛夫。

詠月

見說樓臺滿玉波中間惟只鎖嬌娥
可憐八萬二千戶每到缺時爭奈何

五十

生平曾不事悠悠忽年華五十秋
宦意文情俱淡泊可憐渾似李蒙州

攬照

恥將衰晚競青春強把圓波拂曉塵
自笑年來鬢鬢白

王昭不解作官人

梁景和

隋氏廷中列百官
幾人風節動朝端
越公事勢炎如火
獨有梁毗會忍寒

何桂林

十萬餘工造羽儀
夾堤浮浪去參差
堂堂送入江都去
渾忘當年攬頸時

傲吏

管馬心何在排車意自閒問時將手板拄頰對西山

閬州東園十詠

錦屏閣

茂林斑若錦秀巘矗如屏底處供登覽闌干在杳冥

清風臺

無時來見襲有地更臨高坐客清談起紛紛落塵毛

四照亭

畫箔褰何礙珍叢發已圓願公皆遍賞莫為一隅偏

柳橋

接風誇晚態垂雨怯春寒為問題芳意同誰倚畫欄

曲池

水似珠璫入池如玉磬開臨流唯自適魚鳥莫相猜

明月臺

微稜生海角圓魄到天心共上唯佳客無容照俗襟

三角亭

合棟交生角回欄互引牙由來因地勢不是故尖斜

花塢

繚繞穿紅萼，爛斑踏紫苔。
誰將錦步障，端為使君開。

樂欄

玉笋齊抽日，金釭競列時。
自然俱可愛，莫放畫簾垂。

郎中庵

已築環為堵，仍裁月作床。
公來時隱几，身世在羲皇。

丹淵集卷五